



K a n e a n a

<i>Te Kamauri</i>	1
<i>Kaongora mai iroumi</i>	2
<i>Ana Tangira Te Uea</i>	6

Te Kamauri



Merry Chrismtas, E a bungiaki ara Tia
Kamaiu. Alleluia ieta I karawa!

Kona mauri n Ana Tangira Te Uea.

E kukurei Emmanuera ni kamauri ngkamini n ana Tangira te Uea, tarira ma manera ni kabane inanon ara botaki ni charismatic i aon Kiribati, Biti, Nutiran ao n tabo ake kam mena iai. Ti reita naba te kamauri nakoia ara taan wareware ake a bon tia ni boboutoka aron waakin ao ana makiuri ni kamau Emmanuera.

Ake ba ti a roko inanon te Kiritimati ao ti uaia ni boti banara ni katituaraao a n neboneboea te Uea ba E a tia ni kateimatoaira iroun Tamneina ae e Raioiroi n reitaki inanon ana baintangira nakoira ae Emmanuel. Ti a reiti banara ma anera ake a ruo mai Karawa ni kaota bungiakin lesu nakoia taan kawakin tibu ao ti a bane n neboa te Atua iroun lesu te Tei ae E bungiaki nakoira ni kangai,"Gloria in excelsis deo..Te nebonebo nakon te Atua i eta i Karawa ao te Raoi nakoia aomata aika a nanoraoi".

Te rongorongo ae moan te kakukure
inanon Kiritimati bon rokon lesu ae Natin te te
Atua ba E na maeka i buakora ao are ti kona ni
kabarabra ba te Atua ae Emmanuera. E kaoti ao E
reitaki ngkoa te Atua rinanoia Burabeti ao ngkai E
a bon roko te Atua ni maeka i buakora. E a roko te
maiui i aonaba ao akea ba ti nora aokaburaken
ana kamaiu te Atua ibuakora iroun lesu. I nanon

Kiritimati ao ti a kona ni kakoaua iai mimitongin Karawa ba e ruo nako aonteaba ao ti nora naba iai moan ukin ao kaitibon Karawa ma aonteaba n aron ana babaire ma na kantaninga te Atua mai moana. Ti bon riai ngkanne ni kaonrakeaki n te kimareirei ngkai e kakoauaki kakoroan nanon ana berita ni kamaiu te Atua nakon ana botanaomata are e a tia ngkoia ni baka n te bure inanon Iesu te merimeri ae te Messia are E a bungiaki nakoira. Te bai ae riki teuana ae ti riai ni karabaraba naba iai bon aron nanon Nei Maria are bon temanna n aiaror are a tia n reinekai iroun te Atua ba e na riki ba tinan Natina ao e tia ni kariaia ngke e kangai, "Ana toro te Uea Ngai e na karaoaki nakoioi n aron am Taeka."

E na banin raoi kakukurein Kiritmati ngkana e reke te Raoi iroura ao are ti bon riai n uotia ao ni karabatai nakoia tarira ma manera, riki ake ti tuai ni kabarai aia bure; ara kairiribai ao kain ara utu. Ti na kauki naba nanora ni kona karokoa te kukurei nakoia raora n tauraoi n anganiia ara baintangira ao ara tangira.

Te kantaninga inanon Emmanuera aio ba e na buokira ni karoko te kimareirei ao te Raoi ni Kiritmati nako nanora n tatabemanira. Ti karaba te Uea ngkai e a tia Emmanuera ni karekeea n te moan tai, te kaongora mai Tabuaeran man te Aono n Raina ao Binikiti. Aio are e kaota iai rababan ana tangira ma ana kamaiu te Uea i aon abara ae Kiribati. Ti karabaita naba ara Tama iaon Kiribati ao tarira ma manera ake a tia n anganano ibukin karokoan taian kamarurung nakoia tarira ma manera i aonaban Kiribati.

Te kaitau naba nakoimi ni kabane ibukin ami tataro, ami kaunganano ao ami ibuubokai aika bati ake a tia ni kabobonga ao ni kaotinakoa Emmanuera n te tai aio. Ke karaorioi ngkami te Uea inanon ami Kritimati ao manga te waaki ni kabane inanon te ririki ae 2012, ao ke E kabaroa iaomi ao inanon ami tai ni wareware ana Raoi ma ana kimareirei ao ana Raoi ni Kiritmati te Atua te Tama, te Atua te Nati ao te Atua Te Tamnei ae Raoiroi. E karaorioaki ami Kiritimati ao te ririki ae bou.

Ke a onrake ana botannaomata te Atua n te kimareirei ni butimaea Emmanuera “Te Atua ibuakora”



Koa tia ni manga noora riki ara website n te Kiritimati aio? <http://www.kccrs.org.ki>



Kaongora mai Irouumi

Riibotin te mananga nako Nikunau, 17/5/11–19/5/11

Mai mwuin ana bubuti te Tama lobi are karokoa inanon bain te Tama Koru ao te NSC ao mai ikanne are e a baireaki naba ba e na riai naba ni kawaraki te abamakoro ae Nikunau iaan ana bubuti aia Tama ae karineaki.

Ni bairean te mananga iroun te Tama Koru ao te NSC ao e kangai ba kaka uoman man taian parish aika teniua ake a riai n rineaki ba ana kaina te mananga aio.



Nanona ba onoman taan mananga n te mananga aio. Te kamimi ana babaire te Uea ba tiaki onoman aika a na mananga ma bon ti aman aika tau i b u k i n t e mananga aio.

Imain te mananga ao ti karaba te Uea rinanon ara Tama ae karineaki te Tama Koru are e a manga karekea ana tai mangaira n ana auti i Teaoraereke ike e anganiira iai te korakora ni katokaan baina iaora ni kabane ao ni kabiri naba nanoni baira n ana b'a n aoraki ba aoraki nako aika ti na riinga aomata ao a na kamaiuaki. Ao bon man te tai aio are ti a bon namakina naba mamakurin te Tamnei ae Raoiroi inanora are aiaron ae ti a bon rang tauraoi naba ni kaitarai nako taian mwioko ake E tangirira iai te Uea n te tai nako are e taku ibukina. Aikai ngkanne araia naake a riki bwa kain te tiim ni mananga aio:

Mr Utimawa Bukaireiti mai Betio Parish, Katarina Teitintau Teitiaua mai Teaoraereke Parish. Nei Meeta Eriuta mai Teaoraereke Parish ao, Nei Kantarawa Yeeting mai Bikenibeu Parish

Iai te nano maroa teutana irouia kain te tiim ni mananga ngkai e bon riai ni mananga onoman ao ngk e a roko tain te mananga ao ai ti aman (4) aika a mananga ngkai e angabuauka manangai ake uoman riki ma ti karaba te Uea ba E kaotia ae boni Ngaia ae E na karaoa te beku ao ngaira e na tii kabonganaira ba ana bai ni makuri. Ao e bon koaua ba bon anne raoi te bai are e a bon anganiira norana ao namakinana ngke ti a tataninga baora te wanikiba i Bonriki n te Moanibong ae 17 bongin Meei are ti nang kaea iai nangin Nikunau.

Nikunau

Ngke e tiku ara wanikiba n te aba aio ao e rotira te kukurei, riki are boni ngai ba are boni kain te aba aio ngai ao e a bon maan au tai n aki okira abau aio ba kabanean okirana irou bon 2004 ao I aki naba. Irarikina ao ngkekei ngkao I bon Kamatu ao n te roko aio I a riki ba te tia uota te Euangkerio man te Aro ni Katorika. I rang kakaraba te Uea ba tao bon aio bukin rineau irouna ba Nna kaina te tiim aio ba Nna

kamatoai ao ni kakorakorai nanoia tariu ao maneu ake a tuai rang korakora ao ni mamara ao ni kainnanao buokaia. Te kamimi naba nakoiri ba ti a bon mananga ni batere ba akea raoi ara program ae ti katauraoia ibukin baike ti na waakin n rokora ma ti karaba te Uea ba boni ngaia are e a katauraoa aron ara program tao mai Bonriki.

Ngke ti a otinako man te wanikiba ao I kaman otinako ni kakaea buokara iaan ae I ata riki aon abau aio ao bon aio naba teuana tibwangau ae anganai te Uea ba Nna riki ba te tia birikatai ibukiia tariu aikai ao maneu. E a kaman tauraoi baora ma taan butimaeira are bon te mataniwi ni catechist ae Anania ao raona ana kauntira uoman. A aki tabara ngke a ongo ae ti roko man te charismatic ao are a kamarura ao ni urakin ara bai ni katokai iaon aia kaa ike ti a tok a naba iai ni kaea kautun te Aro are Rungata. Akea aia Tama ae te Tama lobi ba e tuai oki mai Tarawa ba e kaea aia rereua Tama i Teaoraereke. E raraba ba e a kaman kaongongo butimaearea.

Ngke ti a roko i Rungata (kautun te Aro) n ana auti te Tama ao a kaman tauraoi unimane tabeman ake taan butimaei n tataninga, ngaia are ngke ti roko ao a bon waakina naba aia butimaei are aranna ba te kateiwae moa imain are bon ana bomata te Parish n te tairiki anne. E reke naba ara tai ni karoa ara Bau n Nanoanga imarenan taian maroro ao tibatiba ibukin kinaakin raoi ana waaki ma rongorongan ara botaki ae te charismatic. N tain te Bau n Nanoanga ao e bon rang boou te tataro aio nakoia ao a bon tuai naba raoi n ataia. Aio are teuana naba kanoan waara ibukin naba te abamakoro aio. Imwin te maroro n tibatiba ao ti anganaki te motirawa teutana ni kantaninga te tairiki are ai bon tain te bomata ma ngaira. E raba te Uea n nanoia kain te aba aio n te uki n nano are e oti iai ba a rangi n tauraoi ni butimaea ana kamaeu ma ana tangira te Uea are e na kabaroa i abaia.

Ana butimaei te Parish ae Atinibwan Iesu


Ni iteran itiu a te tairiki anne ao a bane n roko Catechist man kaawa nako ni ikotaki ma aia Kauntira ao ai ana taibora te Parish. Aia butimaei aio are e bon riai ni bane kain aia Ekaretia ma ibukin raroan te tabo ao a tei naba aikai ba rabatan te Parish ae banin. Ngke e nang waaki te botaki ao ti a tuangaki moa irua ba ti na teirake



ni katoka moa oneara te bee ae boou ao raona are te bau te kaue ae bane boiararana. Imwina ao e a nako te katituaraoi ibukin te amarake ba e nang waaki te amarake. E bure bairean te amarake riki bon amaraken Kiribati n aron te tou, te mai, te babai, te ika, te nnewe, te ben, te babai, ao a batiri. Imwin te amarake ao e a manga teirake te catechist temanna ni katituaraoi imwin te amarake are a uringaki iai tarira ao manera ake a mena n te burikatorio. Aio teuana kaubain te abamakoro aio ae teimatoa irouia ae uringaki ia kain te burikatorio ni katoa mwin te amwarake. Imwin aio ao e a nako kain te ikikina ngaira ao ngaiia. Ti bon kaitaua te Uea n ana babaire aika raba are ti a kona iai n riki ba irua ngaira iaon te abamakoro aio n te tai ao n te bong ae raba aio mairoura.

Kanoan te Maroro

N tain te maroro ao ti nora aron te ingainga n nano ao te uki n nano n tauraoi ni butimaeaa ana bain tangira te Uea are e nang anganiiia. Kanoan te maroro man ara itera bon taian tibatiba iaon ana tangira te Uea are e bon ringiira iai ni maiura. Ti karaba te Uea ba E bon bainira n ara maroro ni kabane ba e oti n nanoia kain te botaki ae a bon rotaki n taian maroro ake a tabekaki ake kanoan ana tangira te Uea. Irarikin naba anne ao ti a kabarabara naba teutana ara botaki ae te charismatic are bon kanoan te boki are “Te maiu ae Onraken te Maiu”. N te tai aio



ao e a otinako ara program are e a kaman katauraoia te Uea ao are ti a katanoata naba nakoia. N te karangaina ao e na boo te neboneyo n te umantabu ao kam bane ni butimaeaki ni kabane n roko ao iai naba te katoki aoraki ibukiia ake a kainnanoa ana tangira te Uea. E raraba te Tamnei ae Raoiroi ni mamakurina inanora are ti kakaitau iai ba e bon kabonganaira ni koaua ba ana bai ni makuri. A bon rang karabaraba ni kabane n ara program ko ti kangai ao are bon te Tamnei ae Raoiroi ae karaoia ao aron ae taaran e bon rang korakora te taka ni kainnanoan ana tangira te Uea n te aba aio. A bon baebetai nanoia ba tao ai bon aio kaekaan aia bubuti na kon tinaia Nei Maria inanon aia Rotario n ana namakaina aio are e a bon karokoa natina ae lesu inanon ana botaki ae te Charismatic ba e nang katoki nako kainnano aika a rang taka iai nanoia, rabataia ao n tamneia. Ko na neboaki

ngkoe te Uea ae moan te rababa, n rietata ao n nano am tangira nakoira ni kabane.

**Tuesday 17/05/11
Karangaina 0500am**

N te ingabong anne ao ti a rang karaba te Uea ba n aron are e a kaman anganiiia aomata nako te uki n nano ao te ingainga are e a oti raoi n te bong aio ba a kaman roko n te umantabu ni kariaria te aoa 5am. Aiaron ae tia rimwi ba are a kaman utimaaka n roko n tataninga. E raraba te Uea ba ti ataia ba e na bon baro ni koaua ana tangira te Uea ngkai iai te uki n nano ao te ingainga ni kani kamaiuaki irouia kain te aba aio. Ko batiri n raba ngkoe te Uea ae akeatian am akoi ao am tangira ba ngkana ti taka ni koaua ao n tauraoi ni kauka nanora ao ti na bon kamaiuaki. I karaba te Tamnei ae Raoiroi ba E makuri inanoia ao n anganiiia te taka ni koaua ni barua ana kamaiu te Uea are e a bon uki nanoia ao ni ingainga n tauraoi ni butimaeaa ana ran ni kamaiu. N tain te neboneyo anne ao e bon baro ana tangira te Uea ba a bon bane n rotaki kaina aika 40 tabun maitia ake a reke rokoia ao iai naba aoraki ake a kainnanoa ana tangira te Uea ae 10 tabun maitia. Ti karaba te Uea ba e bon ringiia aoraki ni kabane ao ngaira n tatabemanira nako. Ana taeka te Uea n te tai anne e anaaki man te boki ae “Baebaeti” ao atun te wareboki bon “Taekaia Burabeti ni Kewe”. Iai naba ake a reke tibangia n ana taeka te Uea.

Te kauoua ni makoro ngkanne bon te katoki aoraki ao iai naba ake a tibatiba aron ringaakiia iroun te Uea n aia namakin. A maiti ana karea te Uea ake e tibatibai n te tai anne n aron ae iai e anganaki te namakin, ae ongo te bana ae banaan te ataei inanon te neboneyo ni ianena, namakinan te riaboro ae Kaobunang ao namakinan te ang.

Ana karea te Uea rinanon ana noraba Nei Katarina. I karaba te Uea n au tamnei ae anganai ba I nora te bai ae rabunaki I nuuka n te burangketi ae buraerae. I butia te Uea ba e na kanakoa te rabuna ba Nna noria ba tera are iaana ao I karaba te Uea ba E kanakoa ao ngke e a nako ao I a nora te aine ma tibuna ae wene ni babakoia iaon baina ao ibukin waeia te man bubura ae I tuai man nonoria ae kanga taaran te taore ae buraerae ao taningana a bubura. I butia te Uea ba e na kabaeiia ao a bua ao imwina ao I a manga nora te man arei ni mamaiae i nuka ao are I a manga kabaeia naba iroun lesu ao e a bua naba au tamnei anne.

Tibatiba n te Maneaba

E raba te Uea, imwin te Umantabu ao ti a manga bane ni batetea te maneaba ike ti na manga kababanei riki taian tibatiba n ana tangira te Uea ngkai ti ataia ba boni iai aika aki tibatiba ba a babanga ngaiia are i nanon te itera aio ao ti anga reirei teutana iaon are bon maiura ake ti a tia ni katonga iai ana tangira te Uea. Ti karaba te Uea n te tai aio ba tao inanon taian reirei are e a ringaaki iai nanon temanna tarira ma manera ba neiei e a kaman teke nanona n te karea n noraba



“I karaba te Uea n au tamnei ae anganai ba I nora te bai ae rabunaki I nuuka n te burangketi ae buraerae”



*"Bon ngaia raoi bai
akanne ake e nori te
Uea te taore anne ao te
rabuna te burangketi
ma aroia raoi".*

are e tibaia Katarina ma e a bon rang kanganga tibaakina ai ngaia are tao inanon te maroro n reirei ao e a kounako tibangana anne. Aiaron ae ti bon tounako ni kabane ba neiei aiaron ae e bon nakanako riakura ngaira ao ngke e a tiba roko i akura ao e a bon tang naba n takarua. E a kibaria tarira are Nei Meeta ni karaua nanona ma ngaia bon korakoran te ang are e a rang kan ti-



inako ao e taua ba e bon aki kona n tibaia ao aingaia are e a takarua n tang ao i n a n o n tangina ao e a tibatiba ba e bon t e k e nanona n te tamnei are e noraki ba b o n tamneina ma tibuna ae rang aoraki are a bon ira naba te katoka bai n te umantabu ibukin buokana. Te man are e noraki bon tein raoi ana taore tibuna ae rang tatangiria ao te burangketi are e noraki naba bon rabunan naba tibua ae aki toki n rababunaki iai ba e bon rang tatangiri ana bai akanne. Te taore anne bon tiaki ara bai ba te bai ae kuneaki n te Kauntira ao e tatangiria naba tibura aio are kanga ai bon iriana naba ao angin te tai ngkana e na matu ao e tatangiria ni mama tu ma ngaia ao aiaron ae raraui iai riki ngkai e a rangi n aoraki. Te rabuna te burangketi bon tiaki naba ara bai ba bon rabunaia natira ae a uouotia mai Tarawa ao aiaron ae baai aikai a bon rang kakawaki iroun tibura aio ba e rang tatangiri. Tibura aio e bon rang marurung ao imwin reken baikai irouna ao e a reke naba aorakina. Inanon taetaena ao a uotaki bai akekei are te rabuna te burangketi ao te taore ma ngke e noori Nei Katarina ao are e a bon takarua naba "Bon ngaia raoi bai akanne ake e nori te Uea te taore anne ao te rabuna te burangketi ma aroia raoi". E a aki tabara tarira Nei Meeta ma e a butimaei naba n anai ao n nako n angan lesu ba e na kabuokii. Ti a karaua nanon neiere e tang ba e na karaua nanona ao ni kaitaua te Uea ba e a kamaiuaki tibuna. Bon ara kakaitau riki nakon te Uea ba n ana karea n noraba riroun tarira ma manera ae Nei Katarina are e a bon kauki naba nanoia kain te abamakoro aio ao n anganii te karea ae te taka ni koaua ni barua ana tangira ma ana kamaeu te Uea inanon ana botaki ae mamate nanona iai ae Charismatic. Man ana tangira naba te Uea n te tai aio ao anganii naba ngai ma tariu ao maneu te waaki ma te korakora ao te ninikoria ba bon ngaia te tia ununki ao ngaira taian bai ni makuri ake e na kabonganai ibukin unikakin te kora are e nang kabwebwerakea

inanoia kain te abamakoro aio. Man aio are ti a bon rang kakaitau riki nakon te Uea ba E a tia n rineira ngaira aika aman (4) ao ni katan nakoira naba ma aron tibangara aika kakaokoro ibukin kabutan te rongorongo ae raioiroi ni kaotiotia are e maiu te Uea inanora ao E tangirira ba ti na anganira te inaomata ba E na tautaekana maiura ba ti aonga ni kona ni kakaotonga kororaoi ana tangira ni maiura ao are ai bon aio naba teuana kanoan waara iaan mwenga nako.

Kaongora mai Tabuaeran

Mareko Rotiota

Mauri n ana tangira t e Uea,
Eng ti bon mena n MTSS Fanning ao I a bon karautaeka ba e aki roko rongorongan au tabo aei ibukin kanoan Emmanurea are e nako.

Te rongorongo ao ngkai ae a bon buti naba ana tiim te karetimatic mai i Kiritimati are a buti iaon Tabuaeran a bon tia n roko i Tereitaki village ao ae a N nang manga roko te kauaoki n te Kanimabong aei

Ngaira ngkanne ti bon karaba te Uea ba ngke e roko aia tiim ikai ao e a manga maureirei ara botaki ni charismatic aika uakoraki ba kain MTSS ao bon kain te kaawa. Ngaira ngkanne ti bon nenebo n te karingaina koraki ti n te tabati ae ti nebobebo mwin te taromauri ao ataein te MTSS ni katoa katenibong. Kaain te kaawa a bon kakaraoa aia bau n nanoanga ni katoa Kanimabong.

Ma te kamimi ba n tairikin te Kanimabong ao e a kaongoraea Anates natira are Teraaka ba E kaoti lesu ao Nei Maria n te Eukari ao a bon maiti aike a nooria ba raona ataein te kpc ake a rin n nooria. Ana taeka natiu aei ae moan te teke nanou iai are e tuanga tinana ba e bon tuangia kaain te kpc ake raona ba antai te aro ae e koaua ao a taku raona akekei



ba a kakoaua ae bon te Katorika ba e a bon maeu lesu n aia Umantabu. Ngke I a oki ni biriakinii kanaia ataei ibukin te picnic ao e a kaongoai kaain abau te rongorongo ae moan te kamimi ao I bon karaba te Uea iai ao e tang nanou ba e aera ngkai I aki mera ikekei ba I bon kan noria naba.

N te te bong are imuina art e Kaonobong are ao ti a ongo iroun ara Chaplain Teem ba ngaia e bon kaoti e kaoti lesu nakoia aia Riita ao e tang. E kaoti naba nakon temanna te aine ae bon kain te karitimatic ao e aki tang. Ngkanne te mitinare

are i Tereitaki bon raoia ao e bon aki nooria ai ngaia are e a tataro i matan te Eukari ao imwina e a oti ubuna lesu nakoina. Boni ngaia are e a roko ni kamauri Teem n ana tangira te Uea ao e taekinna ae e bon kaoti lesu.

N ana rongorongo natira are Teraaka ao e taku ba a noora lesu ataei ae E taakini baina ao Nei Maria e taakin naba baina mai inano irarikina. Tao e a bon kamimi ao e a bon koaua ba n au kantaninga ngai ao e a bon rangi n raka korakoran te nenebonebo i Tabuaeran n te tai aio. Ngaira ake ti tuai man kakaea te taromauri ti a bon tiba tataro ngkai. Ngai riki are ai bon akea tikin wareu ba ai te mamanging naba mangke I roko n Tianuare n te ririki aio nuua ngkai ai bon ti te kanimabong ao I motinnano ba N na kakaea te nenebo ni katoatai ao n te taromauri.

Rongorongan riki ikai ai bon ara tai ni weekend ma lesu n te Eukari ti a bon kaman motikia uoua te week n nako ba ti na bon otinako ma ataei imwain aia exam n n te moani Kanimbong n te bwakantaai ao ti na kaukia ma te nebobebo ao te kamate anene ibukin te Kiritimati ao ai te tantani naba nuua e ngaina, Bon raora kaain te kaawa ao ngkana a na reke rokoia kaain te kaawa are irarikira are Betania are a bon roro-ko ni katoa karangaina n te Katenibong ba ti bane nuia n nenebo n te Eukari ao ngkanne bon raora naba anne n 2\12\11. Ti na manga nebonebo n te karangaina ao imwin te kaingabong ao ti a oki naba ma ataei.

Ai bon te karabaraba nakon Te Uea ngkai E a tia ni weteai n arau Ngai ae Mareko ba N na kabongana maeu ibujkina N na neboia n au makuri ni kabane ngkana te manginging ao N na taua bangina ao N na neboia naba iai. E rabwa te Uea Alleluia!!!!

Kaongora man St Faustina Youth Teibi Inatio, St Faustina, Betio

Kam na bane ni Mauri n ana tangira te Uea ao mauri naba ngkami tariu ao maneu man ara rororikirake iaon Betio ae St. Faustina. Ti a rimoa ni karaba te Uea n ana bai n tangira aika bati nakoira, Ai bon te bana riki ae rang kakukurei ba n te tai aio ao ti nang tauraoi ni karebwe-taua ao n tiba ana tangira te Uea nakoia tarira ao manera aike kam tuai man n ongo.

Inanon ririki aika nako ao bon iai aia iango ibukin iangoan reken bai n anene ao n nebobebo n aron bai n katangtang ao a maiti riki, ngai are a kaairia ba kanoa aia tataro ni bubuti kain te botaki ae Saint Faustina Charismatic iaon Betio, ao n te tai aio ao E raba te Uea ba e a kaekaaki ara tataro ibukia te karitimati. E neboaki te Uea n ana bai aika e karekei nakoira. Tiaki ti ngai ma n te tai aio are ti a taekinna nakoimi ba ngkai tia tia ni moana ara waaki iaon ara angarerei ma uouotakin ana taeka te Uea nakoia aomata nako.

Ti moana ara waaki ni koroun n te O ni bure i takoronga, are ai bon ara koroun nakon ara moan waaki are ai uotan ana rongorongo lesu nakoia aomata nako nte sport complex. E



*"Ti moana ara waaki
ni koroun n te O ni
bure i takoronga, are ai
bon ara koroun nakon
ara moan waaki"*

raba te Uea ba e a manga koro bukin anne. Ngke e a manga waaki te mananga nakon te sport complex ao e rang kakukurei ba e nakoraoi mai imoana niua e bara. Ti Karaba riki te Uea n ana tangira nakoira ao riki nakon tarira n ara botaki n charismatic are bon raora naba n te tai anne. E raba te Uea nakon Biata Miriata, are motirawa



*“E koro aron
kakamatakuna ao e
kangare, ao tao ngaia ae
rangin onrake iai ironua
aomata aika a bane n
roko”*

naba n te rau n te Tabati are imuina.



A maiti aika roko nTe Sport Complex n te tabati anne, E raba te Uea ao e neboaki ana makuri ma ana tangira, ba e a manga bootira iai ma tarira man Parish aika kakaokoro aika Bikenibeu, Teaoraereke, ao ai Betio. E raka aron te bong arei ba e aki reke aron te mataku ironua aomata ma te tatakaaruua ni ngangarentaake, ngke ti moana ara waaki ao kanga bon akea kaaaina, ma ngke ea waaki nako ni karokoa te kaotioti, ao ea bon taotira te aomata ae roko n mataku. ara kaotioti are tia uouotia ngkai e bon boboto iaon karakinaia taanga aika raure ike a manga rinanon kangangan te maiu aei riki n te rawawata, ao te maraki, riki ai bon te kanganga iaon Abara, inanon te utu teuana ma teuana. Inanon ngkanne ara kaotioti ao ti kataia n karabata aron ana waaki teuare buakaka n ekira nako ba ti na aki tabe ma ana reirei lesu, are E a tia n reireinira. Ao ngaira ti bon reeia nako n tabe ma baikorakin te maiu aei.

E koro aron kakamatakuna ao e kangare, ao tao ngaia ae rangin onrake iai ironua aomata aika a bane n roko. Tabeua makoron te kaotioti aika kangare. A bon maneaua riki iai aomata ake a bon rarawa n ongora n ana taeka te Uea, inanon karaoana ngke a matakaukinna. E raba te Uea n ana tangira. Au katautau ba ai bon kain tinaniku aika roko ngke a aki toki n ongo te rebwetaua ae tang man te Complex nte tai anne. Teuana riki ae I kan tibaia, ba ngkana ti kabotaua are ti nonori n taian birim, n aron Gospel song (Gaither Vocal Band) are a anene taan anene ao audience a tabeki naba baia, n neboa te Uea?, Ai bon aron raoi are e a waakinaki n te sport Complex; ara namakin ngaira kain te rororikirake ake ti anene n te tai anne ni kaira te nebonebo, n te anene ma te kaotioti, a bon kaokoro ma taai ake ti bon tataneiai iai, o aei are tia kan tabekia ba ara kakaitau nakon te Atua ae maka ba bon Ngaia ae karaoi bai ni kabane. Inanon ngkanne te Avenete aei. Ao bon iai ngkanne ara buti ae ti a waakinna ngkai iaon Betio inanon makoro, ao tao iaon kawaira naba ngkai ni buti rake nakon Parish are I a tia n maneweia n aron, Bikenibeu/Teaoraereke. iai ara kantaninga ba ti na bon ninia nako naba ana tabo te botanaomata n aron Bairiki Square ao ai mai Buota n toki Betio.

Aei are ti a aranna ba nikirakin ana taeka te Uea nakoia aomata nako. Tera am iango ngkoe are ko tuai man kina lesu? Te bai ae kakawaki ba inanon am tai ni borau aei ao uringnga ba lesu are bon tei naba n kariariako, e ngae ngke ko kangai man kangai ao ngaia are bon taratarai naba. E uara tariu ao maneu? Au

kantaninga ba e bon reke raoi tibangam man ana kaongora te St. Faustina Youth mai Betio.


Ana Tangira Te Uea

E toki maiun kainabau ao E a manga maiu.
Timoaki John, Emmanuera Charismatic, Teaoraereke Parish

N te bong ae 27th May 2011 ao e a rina ni boo kainabau ae John Revean Kannangaki n te aoa 7.30pm. Iai raona n te auti ba natin maneu ae Koru arana. I mena irarikin te kawai n te tai anne ba okiu n reirei ao I a manga katea ana bus raou n reirei ae memena i Buota. Inanon ara tai ni katei bus iaan au auti irarikin ana Store Taotin i Teaoraereke, ao e a biri ni kawarai natiu are Koru, ao man tuangai ae e a katikitiki buu. I aki rangin ni mannanoa ara rongorongo ao e a manga kaokia naba. Ao man taku “Timuaki bon aoraorakina ae roroko?” I aki tabara ma I a kabanea naba biriu n okira te auti, ao man ataia ba iai te kabuanibai. E manga taku raou ni katei bus arei “Timuaki N na iriko? ao I kaeka “Tia nako”.

Ngke tia roko

ao ai bon te nanokawaki irou ae taonai ba e a wene buu ni baraki, ma newena ae e a otinako ma te rara, ao e a tiki baina ma waena. Ngke I taraia ao e bon baka nakon ara mataroa are n te katangaina. Rabatana e bangaki inanon te mataroa, atuna e mena n te katangaina ao rabatana e mena i itinaniku n te baranta. I a tekateka ietan atuna ni katannakoa au taibora n tataro are e bon mena iai Tinanu Nei Maria Te Baretenia. Ia kaoa te rara ae e nako mai wina ao I a karaua ni katikia nako aou. Ia bon baebaeti nakon Tamau ae te Atua ni kangai “Baba n airon wetean raoi Tamau ironu, “e aera ngkai Ko a bon aki moa karekeua tui tai ni maroro ma ngaiia ao n rabatia ao Ko anganana n aekana aei, ae e a mate ao N nang iranna?”



I euta matau nakon natiu are Koru ao I tuanga, “birinako ni wetea te tia riring n te boo ae Kaiea Tirae”. I a tiku ma raou n reirei arei, ni buokai ao e bon tuangai ae e a bon tiki rabatana buu, ao ngai I aki kaeka ba I bon aki kan ongo ae e a mate buu raoi. Ma I bon ti tuanga ba e na buokai n raira buu man atikia nako aou. I a bon tabe ni katika rabatana are moan te rawawata ni karokoa are e a roko babana iaon babau. I tan rikaki nakon Tinau Nei Maria te Immakurata are e mena iakura ao e a bon nako naba au tataro n ianena ma te tang ironu ae bon moan te korakora, ao ni kanakoa au tataro mai kabin nanou.

I a kabanea korakorau man takarua n tang ao ni ianena nakon Tamau ae te Atua. Ma I bon ataia ae e a bon tatarai n arou arei. E bon reke te itera aoa (½ hour) n arou arei ao I bon

onimaki naba ba e na bon kamauaki buu.

I a manga tabeka naba banau te kauatai ni bututi nakoin Tamau ae Te Atua man taku, "Nanona N nang bon riki ngai ba te aine ae kakawa ae mate buuna?". Ao e bon aki naba bara nanou n tataro ni ianena Nakoina.

Ia namakina naba buroon buu ke babana are e boo ma rabatau ba e tata ae te tata ae rangin ni korakora ke ni korakai. Ngke I namakina arei, ao I bon iakiaki naba n tang man tuanga Te Atua, ba e tata babana ma e bon akin aba ikeike ke bon akea naba te maiu ae nako mai iroun buu. I a manga kaeka naba man taku " Ngkai bon am bait e maiu, ao bon Ngkoe ae Ko kona n angan buu te maiu". Ao I bon ataia naba ba A tatarai n arou arei, Tamau Te Atua ma Tinau Nei Maria ae Te Immakurata.

I ongo te bana ae ai banan Kaiea, ao e roko ni un ibukin weteakina ae kanga e aki rangin ni kaumakaki, ao bon tiba okina n Tutia, ao e a kawaekoaki nakoira. Ngke e a tiba ringa waen buu, ao I a namakina naba te maiu are e a rawerawea ni kaotinakoa buu. Ngke e otinako moan ikeikena ao I a bon kakoaua ae ongo au bubuti te Uea n raonaki iroun Tinau ae Nei Maria.

Ngke e a maiu ngkekei n te maan ae kaan teuana te aoa (1 hour), ao e a bon maiu naba n teirake ao nakonako, ao e mimi irouia aomata ake a roko ni matakauakinna.

I karaba Tamau are I Karawa iroun Natina ae lesu Kristo ao Tinau Nei Maria n aia tangira ae nano, e rietata, ao man ababaki nakon kaain abau ae John Rewean Kannangaki.

N te Katenibong ae 1 Tuun 2011, ao I a kaoia taru ao maneu n te Charismatic n ara makoro ae te Taobe, ba a na raonai ma buu ao natiu n neboa ao n karaba ana Tangira Tamara ae Te Atua.

E raba Te Atua, n Ana Tangira ae akeatiana Alleluia Alleluia Alleluia..

Kamaeuan Natiu iroun te Uea.

Katua Tabanga, Nonouti Island

Ni moan rokon te bootaki aei iaon Tarawa n te ririki 1982, ao a rangi ni mwaiti ana kakai ma waaki are a nooraki iai aron ana Tangira te Uea aika a kamimi n te bootaki n tataro aei. Aio au rongorongo are I kukurei ni kaongoi ngkami n aron moan rokon te waaki ni charismatic iaon Tarawa n te ririki 1982. Te Tama are e moan kabuta te waaki ae kamimi aio bon te Tama Hegglin ma kain ana tiim tabeman. A roko naba irou kaain ana tiim te Tama ao a tuangai ba iai te waaki ae te botaki n tataro ma nebonebo ao a tuangai ba Nna ira aia waaki n te botaki n tataro anne. I bon karautaeka nakoia ma te taeka ae e aki raoiroi ke e rarawata nakoia ibukin aki kinakin te botaki n tataro aei


irou.

Aron aia waaki n nebonebo are I nooria ba a katei baia ao a nebenebo ni kamangao n aia taetae n ianena ao aia anene n tamnei n aron are a k a b a r a nakoia ao are I nooria n aia waaki n tataro n te tim anne. Aio ngkanne are e a bon un nanou iai ao n aki kan butimwaea te waaki n tataro aei ao aikai au taeka tabeua ae rarawata nakoia kaain te tiim.

"Aron ami tataro bon te tataro ni kamangao"; "Ami tataro naba anne, bwa e na aki rikirake iai kaain ara Ekaretia ma ana maiti aika ana birinako nakon Ekaretia tabeua"; "Ti taku bwa ana manga Ekaretia tabeua ma ngaira Katorika ae e rook te waaki ae nang mangaongao ke ni mamara iai aron ara Onimaki n ami waaki aio. I bon tiku ma te aki rau n nano n te waaki aio, ao a kitani kaain te tiim arei ao I aki ataia bwa tera riki aia anga are ana wakinna nakoia aomata."

I mwin uoua te wiki, ao e a riki naba te aoraki iroun natiu ae Erena ae onoua ana ririki ba te maraki ni biroto. Ngke e a rikirake marakin natiu aio ao I a bon uotia nakon te Onaoraki i Bikenibeu ma ni bubuti buokana n te tataro ae te korona, ma ni bubuti naba buokana n tain te Tutia. Inanon tikura n te on-aoraki, ao bon akea naba bitakin marakin natiu arei. E bon aki rin naba kanna i bukin te maraki irouna. E a karinaki ana ran ba e aonga ni boukaki riki marurungina. E ngae n anne ao e rikirake ni korakora te maraki iroun natiu aio ao titebo ma e a bon aki kona n reke buokana nte on-aoraki. E teimatoa n tangitangibukin te maraki ma e bon aki buokaki ni marakina ni bainaoraki ake e anganaki. Ngai ma buu e bon teimatoa ara tataro nakon te Uea ibukin buokan natira aio. Ti kakoaua ba bon akea te kaeka ae ti na noria iroun natira, ma e a bon rikirake riki mamarana ni korakora. N ara kauoua ni wiki n tiku n te on-aoraki, ao I a bon bubuti nakon te taokita otinakora ba e a rikirake ni mamara natira. E kariaia te taokita, ao ti a otinako ni kakaea buokan natira aio. I a kangoaki ba iai temanna te unimane ae e rabakau katokan te aoraki ae te maraki. I aki tabara ao I a waetata naba ni uota natiu nakon te unimane arei. E noria te unimane ao I butia ba e na buokia. E karautaeka te unimane arei ba e aki kona n ringa ba e a bon mamarana. I butia riki ba e na bon ringa ba are e a bon aki reke buokana man te on-aoraki. E kataua ao e a ringa natiu are e teimatoa marakina ma mamarana.

E a ringaki iroun te unimane, ao imwin ringana ao e a tibu birotona ao e aki namakin ao e aki ruberube matana. E bon rangi n nanokawaki te unimane, ma I karaua nanona ba are ai bon te






*'Ngke e a marurung
natiu ae Erena, ao I a
bon nanomaraki n
aron an kairua nakon
te Atua n taekai a kain
te Charismatic'*

mamara te mamara ao e aki kona n reke buokana n te onaoraki. I a bon rangi n rotaki n te nanokawaki ma iriana te tang ba tao ai iraua riki te miniti are i nora iai mama-ran natiu ao e a mate. I a kitana te unim-wane arei ao I a uota natiu nakon te Eukari n te Uwmantabu ma n onimakinna ni koaua ba e na bon maiu natiu irouna ngkai e mena irouna te maaka ni koaua. N rokou iroun lesu n te Eukari ao I a bubuti ma te tang ba e na buoka natiu ba iaoni kawaina ni mate. I nora natiu bon arona naba ma e aki kona ni kamwakura rabatana ma baina, ao I aoni kawaina ni mate. I karabwa te Uea ba e a roko te iango irou are e kangai. I karautaeka ba I bon aki kona ni kamaeua natim i matau n te tai aio, ma e na kona ni maiu natim irouia kaain te charismatic ngkana a tataro ma ni katoka baia n arau ao e na maiu natim. cl waeta-ta ni kitana lesu n te Eukari, ma ni kawariaa kain te charismatic, are a bobotaki ni iangoa aia waaki ibukin aia botaki n tataro. I weteia ba a mena n te maneaba, ba a na tataro iroun natiu ae nang mate. A roko tariu ao maneu aikai, ao a tataro ma n nebobebo ba are a bon nora natiu ba iaoni kawaina ni mate. Imwin aia tataro ni katoka bai ao tera ae riki? E a teirake naba natiu arei ao e tei i matan te mataroa, Ngke a nora anne taan tataro ao a manga takarua naba n nebobebo. E toki te nebobebo anne ao tera ae riki? E a nakon au rebwerewbe natiu anne ao e tangira tinana ao e a kan amarake naba n te tai anne. E a bon rangi ni marurung raoi natiu ae ai bon te mate iaan makan te Atua n te waaki ae te Charismatic. E raba te Atua, ao I kabara au bure n aron are i aki ata arona, ao I a kaina naba te botaki n tataro ma te kukurei.

Ngke e a marurung natiu ae Erena, ao I a bon nanomaraki n aron au kairua nakon te Atua n taekai a kain te Charismatic n aron are kam a tia ni warekian au karaki aio. I a bubuti nakon te Atua ba E na nanoangai ma ni kabarai au bure n aron au kairua ibukin aki otau n ana waki te Uea are E kani makuri irouia aomata n ana waki ae te Charismatic. Ngai ma kain abau n te tai anne ao ti waetata naba ni karaoa te Course ibukin te boki ae "Te Maiu ae Onrake n Te Maiu." Bon 5 nakon 9 te wiki maanin ara Course n tataro anne. Ngke e a moanaki ara Course n tataro n anne ao tebubua tabun tarira ma manera ake a kukurei naba ni karaoa aia course n te boki ae Onraken te Maiu. Ti bon kaitaua te Uea ba E a tia ni buobuokira n te waki n reirei aio rinanoia ara Leaders n ara kurubu



aika kakaokoro. Ngke a koro ara wiki ni course ao a bane kain ara course ni kainaomataki iroun te Tamnei ae Raoiroi n ai aron are kam a waaki iai n taai aikai. Ngke e a tia te kainaomataki ao ti bane ni manga tibatiba ma ni kairia tarira ma manera ake a kukurei ni manga moana aia kooti n te boki ae "Te Maiu ae Onraken te Maiu". Ngke tia tabe ni waaki n tataro ao a bon maiti naba ana karea te Uea ake a kona n noraki n taian kurubu aika a kakaokoro n aron te katoki-Aoraki ao te kanaku riaboro mai irouia ake a taniaki iai a mwaii riki.

Bon iai naba kaain aro tabeua ake a rairaki nakon te Katorika n te tai anne ao e batin raba te Uea. Alleluia!!!

Imain ae n nang totoki au rongongo, ao I bon teimatoa n atonga ae kangai "Ko raba te Atua ae Tamara, n am buoka ae kamimi aio are a bane tia n reke buokara aika a kakaokoro ma ni kamimi ian mwakam ae tabu mani mimitong. Tariu ma mwaneu boni iai teuana ana rongorongo te Tama Hegglin ae moan naba te kakawaki. E taku te Tama "Kam riai n ataia tariu ma mwaneu bon te Atua ae Tamara, e onrake n te maaka ma taian karea, ao E kan tibai karea aikai nakoia aomata ni kabane ba aonga ni bane ni buokaki ma ni kamauiaki. Ao ai bon banan naba te Uea are E a tia n taekinna nakoira n te tai aio, ao tera au iango ao ami iango ba e aonga n reke irou ma ngkami te karea mairoun te Uea ae moan te kakawaki, ibukin buokara ao buokaia naba tarira ao manera ni kabaneia, ao riki buokara nakon te maiu ae e aki toki. Tariu ao maneu ni kabane, ti a uaia n reitaki n te tai aio ni bubutia te Atua ae Tamara ba E na buokira ma ni kairira nakon te waaki ae te Charismatic ba ti aonga ni bane n noora ma ni karaoa te makuri ae kamimi ba ti aonga ni bane ni buokaki n te tai aio man tokanikai iaoia aiara aika taan kamamara te botanaomata, ao riki ba ti aonga ni bane ni botaki ma Ngaia n te maiu ae akea tokina. E na neboaki te Atua ae Tamara ngkai ao n aki toki. Alleluia! Alleluia!

**Biata Miriata, Te Kauoman Riita man Nei
Tengore Betio. E rimoara nakon Te Uea
nte 18th November 2011. Ke e butimaia
Te Uea ao n nebobebo ma kaain Karawa ni
mimitongin te Kirimati i karawa.**

